

IL CLUTGER-BASELGIA A RUERAS

Igl ei uonn gest sissonta onns che la baselgia da Rueras posseda in imposant clutger cun zenns novs. Ils 28 da matg 1929 ha giu liug la benedicziun dils zenns entras igl uestg Georgius. Davart la historia dalla erecziun dil clutger, teschamber e la cumpra dils zenns exista ina bufatga scartira cumpigliada da Leci Antoni Brugger *1868 - +1946. Gest pigl anniversari da sissonta onns dil clutger para ei a mi adattau da publicar quella biala lavur en la Tuatschina. Igl original sesanfla egl arhiv dalla pleiv. Tscheu e leu haiel elavurau la lavur ed adattau alla ortografia dad oz.

Tarcisi Hendry

Introducziun

Rueras, il matg 1934

Igl ei ussa vargau plirs onns dapi che havein menau atras las lavurs vid la baselgia da s. Giachen.

Stimulus e sez incantaus da scriver ins gada ensemen empau reminiscenzas da quellas lavurs, da quei vegniu, curriu e passau, vulein nus oz semetter vidlunder e metter ensemen in per notizias per dedicaziun als vegnentsuenter. L'intenziun ei da scriver la verdad sco igl ei stau e passau, aschi lunsch sco gl'ei a nus enconuschent. Dalunsch, ditgel jeu gia all'entschatta, seigi il vuler offender enzatgi. Mo il cronist, sche jeu astgel senumnar aschia, sto scriver sco igl ei e..... la verdad ei buca adina beinvegnida. Per igl emprem stoiei engraziar a signur Leci Antoni Cavegn per la buontad da dar a mi per orientaziun ils protocols, ils quals ein menai e secrets dad el cun capacitat; dian clar e bein atgnamein era quei il qual jeu vuless perpetnisar. Signur Leci vegn a perdunar, sche quest Leci sesurvescha bia da siu partatg concepiv en ils protocols. Quels raquentan dallas radunonzas da vischins, dalla cumissiun e fineschan cun l'ovra finida tochen ils zenns novs.

Las preparativas

Ei era il davos da mars digl onn 1926. Cheu serasa la nuviala ch'il zenn pign da s. Giachen seigi sefess. Igl ugau-baselgia, signur Vigeli Venzin ha radunau ils vischins en casa da scola sut il datum dils 13 da zercladur e purtau avon a quels treis offertas, ch'el haveva corrispundiu cun signur Egger da S. Gagl. Ils vischins han denton suenter viva discussiun acceptau ni ina ni l'autra dallas treis offertas presentadas, mobein concludiu: De far si in zenn aschi grond sco possi en clutger, seigi tuttina sch'el mondi buca d'accord cun l'auter. Il principal seigi ch'el vegni udius bein, pertgei ins astga schon dir che la pli gronda part dil vitg piteva

ina gronda miseria cun udir a tucond. Nus schein gia alla entschatta : In necessari basegns!

Suenter ei vegniu moviu d'in um ord miez la radunonza, ch'ins duessi patertgar da far in teschamber. Quei um empau vegl ha raquintau als vischins, co ses vegls ed auters raquintavien co ses antenats havevan baghegiu la presenta baselgia igl onn 1730. Sche nus calculein che nies tat era naschius igl onn 1805, sche po ei en e.... sbiglein nus tuttavia buca da dir ch'il tat eri la generaziun che ha baghegiu la presenta baselgia da s.Giachen. Aschia savein era crer, che quei che nos tats e tattas raquintavan era tradiziun vera. Quels schevan: Ei havevien stuiu far aschi bia lavur cumina, ch'il davos erien ei vegni unfis e fatg ord la tuor il teschamber enstagl ira vinavon cun la tuor sco ei era provediu. Quei um sez staus caluster metta lura avon alla radunonza tgei miseria da plaz quei seigi en quei carmalet teschamber. Las fiastas cura ch'ei seigi en treis spirituals sappien ins buca sevolver ed era co il resti, plaunas e tut, seigi pass e da meffa. El recamonda ch'ils convischins duessien far enzatgei en caussa. El metta era a pèz, che da siu seregurdar hagi questa generaziun fatg nuot vid la baselgia. Ei seigi vegniu fatg ina totala restauraziun, mo quella hagi mulestau negin. Igl ugau Sep Lurenz Venzin hagi procurau ed era sez tut pagau. Quel hagi persuenter era persuls il meret. Per conclusiun fa el la proposiziun da schar vegnir signur arhitect Hardegger, sesents a Muster. Numnau signur arhitect hagi gia fatg bia dil bien vid plans da baselgias per pauc e bia lavur per nuot.

Suenter empau discussiun, tier la quala ins ha principalmein fatg valer la miseria da buca udir a tucond, quels giudem il vitg, quels orasisum, sco era ils da Dieni, il Baseli cun sia marcanta vusch, han ils vischins priu unanimamein il conclus da schar vegnir igl arhitect ed era da baghegiar in pli grond teschamber ed era ina tuor. Lu sappien ins metter si gronds zenns ch'ins audi e cuntentien ils vischins. Per ponderar la sura caussa ei lu vegniu elegiu ina cumissiun da siat commembers. Numnadamein ils suandonts signurs: Vigeli Venzin, Baseli Berther, Giachen Antoni Cavegn, Giachen Lurenz Caduff, Gion Fidel Caduff-Bigliel e Leci Antoni Brugger.

Il sura numnai ein vegni ensemen ils 20 da zercladur en casa da Giachen Lurenz Caduff ed ein seconstitui. President ha il Vigeli Venzin surpriu, actuar Leci Antoni Cavegn. Pli tard sut il datum digl empem d'uost han ils vischins aunc numnau signur Lucas Cavegn sco cassier en caussa. Plitard ei aunc vegnius elegius Gion Antoni Berther, meister, aschia che la cumissiun da baghegiar era cumpleta cun nov commembers. Il siat sura numnai en casa da fravi Caduff-Giossi han quei di concludiu da schar cular in zenn niev tenor il plan presentaus d'ugau Venzin. Quel pudessi vegnir sin circa 1400.— francs. Quei zenn ei lura staus en funcziun la fiasta dil Cor da Maria, davos uost. Quei zenn ha Segnerfarrer Fetz benediu, mo ei draccava ad in draccar, sco da dir quei zenn vegn en cunauras - vegn buca vegls!

Igl aultreveri signur pader Baseli Berther, nies augsegner da Dieni, ei medema-
mein staus plein fiug e flomma. Signur architect Hardegger cun nies car pader tut
incantaus cun il conclus dils vischins ein cumpari sil plaz, han miserau la baselgia
sin tuts mauns per eventual plan. Quei era ils 28 da zercladur e gia igl emprem
d'uost ha la cumissiun saviu presentar als vischins in stupent plan co baghegiar
tuor e teschamber sco ei vesa ora oz. Ils vischins han approbau ils plans e
dasperas aunc concludiu da far in mir entuorn la baselgia per trer ora il freid e
humid. Quella lavur ei vegnida menada atras cun far suten il fundament e cun far
ina turera entuorn baselgia per suten ventilare e suren trer giu las auas.

Ins haveva manegiau all'entschatta, che sche mintgin sustegni finanzialmein sco
el possi a conform sias forzas da rauba, sche savessien ins pli bugen tralaschar
d'ina taglia e repartiziun directa. Mo quei ei beingleiti semussau. Buca tuts car-
gavan en tenor puder, perquei ei sut datum dils 26 da settember 1926 vegniu dau
vischins e scaffiu il modus co pagar. Ina tiarza dils cuosts dueigien vegnir reparti
sin las casas e zuar tenor schazetg dalla segirada da baghetgs. Ina tiarza sin ils
fiugs che existan dapresent. L'otra tiarza sils habitonts cun far quen onn per onn.
Quei ei stau in bien conclus. Senza quella norma havess ei pli tard dau bia
malemperneivel.

La lavur entscheiva

Igl atun 1926 han ins procurau ch'ei vegni mess ensemen bia salbun. Il quitau per
quella lavur ei vegnius surdaus a Beer Sep Martin e Hetz Sep Antoni. Da trer
neutier ei vegniu fatg ina via da Milà ora giu e per ils bos vits digl uaul ora e viagi
sul Rein tiel sablun da maniera che negin sentaupi. La cumissiun ha cun egl clar
vuliu ch'ei vegni enasi pli bia sablun che quei ch'ei duvrava per far il teschamber.
Quei ei stau in bien patratg. Aschia ha ei aunc tunschiu d'entscheiver cun il
fundament dalla tuor il medem atun 1927. Gia la primavera, il davos mars,
havev'ins entschiet cul teschamber cun far ziaghels da cement e cun ruosnas per
ventilaziun. La lavur da miradur ei vegnida surdada a Giusep Zazzi sesents a
Muster. Quel ha cun tut quitau menau atras la lavur da maniera ch'el ha era giu
credit per la lavur dalla tuor. Tenor siu cussegl havein entschiet a metter il
fundament per la tuor gia quei atun. Quei ei stau pigl onn vegnent ina buna fatga.
Per Sontgilcrest 1927 fuva il niev teschamber sut tetg ed aschi en uorden ch'ins
ha saviu guder el per nossa fiasta da Sontgilcrest e ss. Cor da Jesus. - Paregliau
cun il veder, ina gronda midada, bien plaz giufuns e suren aunc duas alzas
beinsurvidas per metter giud maun il resti da baselgia. Avon stueva quel vegnir
salvas si en scaffas humidas e per las casas privatas entuorn e steva en general
mal.

Il tetg era vegnius construius da Giachen Giusep Venzin da Darvella che haveva per dunna ina da Rueras. Alvs sco la mort era nies augsegner vegnius, sur Gion Antoni Venzin, cura ch'il scribent da questas lingias ha detg ad el: Oz suenter viaspras havein el senn da bardeglar ora il teschamber, sch'els ein cuntents. Mo cun pli gronda legria ha el saviu entrar e rugalar en il niev, il qual tut ha cuviu ad el da cor bugen. Oz, anno 34, ei il giavisch da tuts ses parochians ch'el possi l'auter onn celebrar il giubileum d'aur, 50 onns spiritual premurau e pastur dallas olmas en nies vitg da Rueras. Quei detti il bien Jesus cun siu cor per pagaglia per la confraternitad dil Cor da Jesus ch'el ha fundau e menau en ed ei oz a tuts fetg cara.

Per spargnar havevan ils vischins surpriu da far las lavurs da manual e perquei vegneva ei mintgamai la dumengia pendiu vid la petga-fontauna tgei di mintgin hagi da luvrar. Tgi cun gronda premura, tgi pli nuidis compareva aschia alla lavur tenor roda. Ei ha tucchau bia da luvrar per omisduas ovras.

Ella alzada sura, damaun sura ei vegniu schau in esch sulet per puder siaden cun la stalla da Nadal ch'era buca pusseivel d'ir da scala si. La stalla ei in schenghetg d'ina dunna tudestga, il num ei a nus buca staus enconuscents.

Avon che nus entschaveien cun las lavurs dil teschamber ei nies architect signur Hardegger morts. Quei ei stau ordvart donn per nossa ovra. El ha quintau per ils plans nuot, mo la pagaglia da Diu. Alla signura Hardegger havein tarmess la condolientscha sco enzenna d'engraziament.

Nus havein sinquei manegiau ch'ils plans haveien nus uss e cun quels savein segir ira vinavon cun las lavurs. Mo sin cussegl d'in um cun exprientscha, che haveva presidiau ina cumissiun, ed haveva baghegiau ina baselgia e tuor, havein plidau cun signur architect Maier d'Ursera, il qual ha bugen surpriu quei survetsch ed aschia priu giu la responsablidad dalla cumissiun. Quei medem um, signur Muheim president a Caschinutta ha era cussegliu Leci Brugger ch'era dalla cumissiun vegnius tarmess vi egl Uri per tschercar buns tagliacrappa. El ei serendius a Wassen tier las firmas Regli e Loretz ils quals han dau plaid da tarmetter e tarmess in capavel um che luvrava per dus. Il num era Gänzi maridaus cun ina da Wassen ed era oriunds dil Tessin. Ils 16 d'uost ei lu signur Maier vegnius a Rueras sin ina uatga arisguard la crappa tagliada per il clutger. Il material, crappa granit e la lavur ha plaschiu ad el. Sinquei ha el priu investa dils

plans da signur architect Hardegger. Quels plans han plaschiu ad el stupent ed el ha detg: Cheu havein da prender naven ni metter vitier. Silsuenter havein lu sediscurriu sur da nossas lavurs e co prender a mauns endretg la caussa. El dat a nus en tuttas damondas bien cussegl e surpren da scriver las offertas als signurs Zazzi e Delgros a Muster. Igl architect manegia d'era aunc schar dar en offerta in grond sorprendider da tschei maun dall' Alpsu, numnadamein la firma Strub d'Ursera per saver cumpregliar. L'offerta da Zazzi ei stada denter quellas treis la pli favoreivla. El gudeva era gia nossa confidonza sco sura gia detg. Ils otg da settember ei architect Maierturnaus tier nus. El ha sez contrahau cun signur Zazzi e scret il contract. Milsanavon era tschentaun las suandontas cundiziuns. La tschentada dalla tuor stoppi vegnir fatga gia il medem atun. Il fundament stoppi esser naven dalla surfatscha dalla tiara aunc dus meters afuns. Quei ei lu era vegniu fatg e betunau en cun tut quitaun. Ina buna entschatta per igl onn suandont.

Ils 19 da schaner ein stai radunai ils vischins en casa da scola. Signur Venzin president dalla cumissiun ha dau giu quen dil teschamber. Quel fageva in total da 3246.40 francs. Ei vegn quei di era recumandau da dar daners durant igl onn per quei intent per buca stuer arver in conto tier la banca. Igl ei vegniu legiu avon la lavur fatga dils vischins. Quella mussava gia ora igl emprem onn 532 schurnadas e 733 vaultas sablun. Acuta era la damonda dil tetg-clutger vegnida, schebein ins vegli restar tiel previu tetg da stuors ni far irom e quei sin cussegl da capavels umens. La radunonza da vischins digl emprem da fevrer ha lura concludiu cun fleivel pli da far tetg d'irom. Ina unfrenda da melli francs dapli. Oz ein ins cuntents da haver elegiu il car e speronza era il bien e pli cuzzont. Sinquei ei la cumissiun-baselgia seradunada ed ha surdau la lavur als frars Huonder da Muster. Il prezi per irom puliu muntava a francs 17.40 il m2.

La lavur vid la tuor

La primavera 1928, aschigleiti sco l'aura ha lubiu, ei sgr. Zazzi vegnius cun ina partida luvriers ed entschiet a metter crappa tagliada in sin l'auter. Igl ei iu bein vinavon. Sogn Giachen ha adina giu bien quitaun per la dretga aura per sia lavur. Cun Sontgilcrest fuva il mir gia finius si. Biara lavur havev'ei dau als lennaris da haver pinau dafertontier per mintga alzada ils ischenchels cun las midadas per las scalas. Quei han frars Giossi procurau cun premura sco era las scalas per la tuor tochen sum.

Il sorprendider da far il da lenn per la tuor, savein cun luschezia menziunar in Tuatschin. Igl ei quei Vigeli Beer da Sedrun, in els trenta. El fuvà staus bia a Tavau e schiglioc seperfectiunaus el mistregn. Aschia ha la cumissiun cun fidonza saviu surschar ad el quella construcziun delicata. Ins astga dir lavur ell'aria. Gideivels ein stai ad el ils frars Giossi cun las maschinas sco era aunc auters meisters vischins. Signur Vigeli Beer haveva gia avon tratg ord il plan da signur Hardegger la mesira per tut la lenna ch'ei duvrava per construir la tuor. La radunonza da vischins haveva gia all'entschatta concludiu da dar gratuitamein tutta lenna per quella ovra da s. Giachen: Denton ha negin giu in' idea tgei tochet uaul quei drovi per tut il lenn. Signur bostger Baseli Huonder ha manegiau alla finala ch'ei seigi aunc bien, che buca tut sappi cons meters ei seigi vegniu duvrau, schiglioc savess ei aunc ad in u l'auter far pial gaglina. Il meglier savess signur Leci Cavegn, nies ugau da lenna, discuorer sur da quella caussa. El haveva survegniu l'instrucziun dil meisterlennari Beer sco era las mesiras. El ha stuiu cumpignar ils luvriers egl uaul s. Brida e Surrein, mesirar e quintar tochen che tut ei stau preparau. Biaras cargas, cargunas ein vegnidas transportadas a Rueras. In lenn duvrav'ei in grossezia e lunghezìa. Ins ha stuiu far vegnir in um da Mustér ch'era disaus da resgiar emperniez liungas plantas. In auter lenn quader entir stueva ver diesch meters lunghezìa ed ina grossezia da 16 sin 16 e dueva esser quel che tegn la crusch-tuor. Vesend quei quader sil plaz avon baselgia damonda in um vegl: Mo nua pomai duvreis in tal quader? Ed el survegn per risposta: Quel vegn fermaus dus meters sur il mir che vus veseis ed en quel vegn la crusch fermada. Sin quei di il vegl: Jeu sun memia vegls per crer da quellas tschaguolas. Tonaton fuvà la caussa aschia, schegie ch'ei fageva sterment aunc a biars auters mo da patertgar vidlunder. Meister Vigeli Beer ha pinau tier tut giun plaun, luvrau exact e bein e cun in quen perfetg. Nies architect cun in um da Zug, in um da professiun en da quellas caussas ha dau giu in laud perfetg exact e schuber dapertut. Quei ei era semussau enten il metter ensemen. Ils 26 da fenadur ei la tocca pinada sur la casa da Paul Riedi per viagiar si ell'aria. Mo co far? Signur Zazzi haveva endrizzau ina tuor per trer si la crappa e cun quel han ins era tratg si la lenna. In um ei cun quitaun ius vinavon cun las punts che sgr. Zazzi haveva schau anavos. Quei ha duvrau inschign, mo era material. Las punts ein vegnidas construidas da maniera ch'ins seigi segirs da montar tonta lenna liunga e greva. Ina qualitad particularmein buna per quella lavur e quei mument critic era quella da scrinari Beer da far cun temps e peda, denton segir. Quei ei era semussau havend dau negin accident tier tut quella spuretga lavur. Che tut ei iu senza mal stuein nus era scrire tier a nies grond patrun s. Giachen. Nus astgein secapescha buca emblidar ils paternos e momentos da nies bien augsegner Gion Antoni Venzin.

Ils 10 d'uoost era il tetg latius ed ils Frars Huonder han saviu entscheiver cun far il tetg d'rom. La cumissiuon haveva suenter esser stada sinformada ed era sin giavisch da signur architect Meier, fatg metter si in cundrez che tili giu il cametg. Il scribent da questas lingias era sepustaus in toc naven per mirar co il stagner Teodor metti si la crusch. Ei era quasi ina nauscha fatga pertgei la pintga crusch sco ella para giu cheu, fuva tonaton dus meters per in. Ella ei vegnida construida da fravi Caduff ord bischel e fuva da gronda peisa. Il battacor ha calau a mi e segir a plirs auters vesend la crusch el liug destinau ed igl um curaschus puspei giu sin tiara franca. Dieus seigi ludaus! La fiasta dil ss. Cor da Maria dils 26 d'uoost eran las punts per la lavur da lennari fatgas giu. Ils miradurs havevan aunc da vegnir e schubergiar e fugar ora sia lavur. Vid quellas lavurs dil palancau dalla tuor havevan vischins elegiu treis umens stabels. Numnadamein: Berther Gion Antoni, scrinari, Cavegn Paul e Leci Antoni Cavegn. Il davos numnau ha grond meret per il quitau ch'el ha stuii purtar per pinar la lenna per la lavur sezza sco era per tuttas punts. Dieus vegn ad haver nudau la pagaglia e s. Giachen vegn segir a purtar ad el tier il davos quen.

Il Sontgilcrest 1927 havevan cun plascher il niev teschamber. La fiasta dil Cor da Maria 1928 havevan la tuor sut tetg. Quella fiasta dil Cor da Maria cun la confraternitad era vegnida fundada 1848 e mess la fiasta sin la secunda dumengia d'uoost. Ils nos vegls schevan ch'ei vegnevi massa pelegrins sin quei di a s. Giachen per la fiasta e venerar il cor da Maria, la mumma celestia. Pli tard han ins mess la fiasta sin la quarta dumengia d'uoost. La fiasta dil ss. Cor da Jesus ei vegnida fundada igl onn 1892 da sur caplon Venzin.

La cumissiuon ha elegiu Leci Antoni Brugger per ira a Muster e supplicar il pader Baseli Berther da Dieni da vuler far ina scartira per metter en la cuppa. Pli tard in plaid sur dalla cuppa. Il bien conventual dalla claustra da Muster vuleva igl emprem bein ord humilitonza s'excusar. Quei saveis vus far meglier che jeu. Pertgei buc ? E vies caplon? Sche neu cun in bien patratg! Ei fageva zun prescha mo l' auter di ei la scartira vegnida gest a dretgas uras. En tutta furia han padrin e figliols copiau giu ella. Teidla pressapauc aschia: Pia memoria a nos vegnetsuenter. Vegli Niessegner entras l'intercessiuon da Nossadunna e sogn Giachen benedir e pertgitar Rueras cun ses habitonts ussa e per adina. Lura raquenta il pader cuortamein quei che hai scret avon e co la lavur ei vegnida instrada e menada atras. La fin d'uoost dumbrava Rueras cun Dieni 253 habitonts che sedividevan en 14 fiugs, schlatteinas: Tenor alfabet sco suonda: Beer 7, Berther 41, Brugger 7, Caduff 25, Cavegn 41, Curschellas 2, Deplaz 5, Giger 7, Giossi 18, Hitz 15, Monn 31, Muggli 2, Riedi 21, Venzin 31, = total 253 personas. En ina scatla sigilada ei vegnida messa quella scartira dil pader Baseli, sco era in carnet dil medem autur cul tetel: Tschels onns. Dis commemorativs. Lu la davosa numra dalla Gasetta Romontscha, dus ded in rap, in da dus raps, dus da diesch raps ed in da vegn. Total 44 raps.

Nus exprimim cheu en num dils vischins nies sincer e grond engraziament al preziau pader Baseli per la gronda premura demussada per nossa ovra dalla entschatta tochen a fin. Dieus vegn ussa a haver remunerau el cul sogn parvis.

Quella cuppa ha da restar adina tarlischonta e biala, pertgei tier la cumpra havein preferiu il meglier e pli custeivel material. Mo gia igl unviern sissu ei iu ora la tschontscha che la cuppa seigi defecta ed hagi en plirs loghens giu il sulerau. Ins ei sesurvi da perspectivs e tut che stueva confirmar ch' ella seigi veramein rutta. Signur Huonder ha stuiu constatar il medem. El ha allura priu en inquisaziun il construider dalls cuppa sco era quel che haveva sulerau ella. Tuts havevan fatg lur lavur endretg ed en uorden. La primavera suandonta ei signur Huonder vegnius in di per mirar suenter la cuppa. El ei cun entgins auters seruschnaus dalla tuor siaden tochen si tiel barcun amiez il tetg ch'era fatgs aposta per eventualas reparaturas vid il tetg. Da cheu anora han tuts saviu constatar ch'ei maunchi in summa nuot vid la cuppa. Anzi il cuntrari, essend ella tarlischonta sco in spieghel. Sulettamein resplendevan las casas neras e baghetgs ella cuppa e quei pareva leugiu ner e defect. Quei ei stau ina legreibla novitad per nus tuts e per signur Huonder. El haveva fatg il tetg e tut cun premura e vuleva buca far novs cuosts cun prender giu la cuppa e crusch e semetter en prighel. In sincer Dieus paghi ha bein era la cumissiun pudiu dir, essend deliberada da quei derschalet.

cuntinuaziun suonda

Nus havein gia detg ch'ei hagian unanimamein concludiu da baghegiar la tuor ed il teschamber. Havein medemamein giu detg ch'ei fussi bien sche mintgin havessi unfriu tenor sias forzas per quella sublima ovra. Mo beingleiti ha ei semussau il cuntrari. Ina partida vuleva impedir da baghegiar la tuor. Quella partida cuntraria serischlava buca ensemen orda quels, ils quals havevan gia suttascret da bugen tschiens e mellis per l'ovra. Na, era buca denter quels che han da retschiert cargau en per ils zenns novs, ura eav. Els ein stai d'anflar denter quels che han luvrau quei ch'ei han stuiu e pagau suenter aunc inagada haver viult e bitschau il daner. Perpletg havevan ils vischins giu decidiu gia ils 26 da settember 1926 pervia dil pagar la tuor e tabernachel dalla baselgia da s. Giachen.

Quella critica cuntraria ei stada per la cumissiun da baghegiar ina fideivla cumpogna tochen alla finizium dall'ovra. Perquei less jeu citar in vegl proverbii: Nua ch'ei vegn baghegiu ina baselgia al Segner, leu baghegia il nausch ina caplutta. Quella partida havess bugen viu, ch'ins havess igl emprendratg giu quei ch'era vegniu en voluntari, mo la cumissiun ha vului che quei resti leu per finir l'ovra endretg. Ils vischins havevan concludiu da baghegiar, da pagar e schizun approbau il modus da pagar. Quei quèn ha dau bia da paterlar e tschintschar ed igl ei perfin vegniu detg ch'ins hagi mai dau giu in quen exact.

Sin il sura allegau selubeschel d'extrar plaid per plaid il protocol secrets da signur Leci Antoni Cavegn pertuccont il dar giu quen.

Radunonza dils vischins dils 23 da december 1928 en casa da scola.

1. Dat sgr. president giu quen da tutta lavur fatga tochen uss, il qual ha seresultau sequentas spesas:

Per tagliar crappa	3337.95
Segirada da luvrers	183.90
Segirada encunter tiarzas personas	43.20
Giusep Zazzi miradur	5343.15
Huonder pil tetg	3200.–

Scrinaris:	Beer Vigeli	770.10
	Giossi frars	457.–
	Beer Sep Martin	140.80
	Berther Gion Antoni	112.40
	Cavegn Leci Antoni	80.–

Fravis :	Caduff Giachen Lurenz	641.90
	Beer, fravi, Sedrun	20.–

Brugger per carbolineum	40.60
Brugger	21.20

Columberg, picturar la crusch	20.–
Arhitect Maier	234.80
A. G. per siaras e nitas	84.50
Cavegn, frars, tscheins e lavur	471.–
Per fender crappa	1214.20
Per igl iert da Duri Vigeli	50.–
Cuost dil teschamber	3246.40
Cuost dil zenn niev	1059.55
Total	20772.45

Arundau sin 21'000.-- tucca sin treis muns 7'000.-- francs per mun.

I Sin schazetg 2319: 80 e quei fa 30:20.

II Sin fiugs = 46 e tucca 152:20 per fiug.

III Sin persunas tucca 27.70 per ina da pagar.

Quen dalla lavur: luvrau total 1171 1/2 di partiu sin 43 fiugs tucca per fiug 27 dis.

Ils quens ein vegni approbai ed ei vegn concludiu d'amortisar en tschun onns tut. Plinavon vegnan normas acceptadas pertuccont novs vischins e casas novas.

Ils daners rimnai ordeifer il vischinadi vegnan mess vid ils cuosts pils zenns novs ed ura. Quei ei stau la davosa radunonza da vischins per quella ovra.

Ils dus zenns sin il vegl clutger ein aschi gleiti sco la tuor ei stada finida vegni transportai neu en la tuor ed il vegl clutger sil spitg-baselgia ei sparius per adina da nies egl. Il desideri denton suenter zenns novs ha beingleiti fatg sevaler. La tuor cun tonta lavur e cuost era gie baghegiada mo per quei intent: Metter en zenns ch'ins audi. Denton ina greva damonda. La cumissiun ha sentiu la responsablada che schischeva sin ella. Tartignava ella era ei finiu per generaziuns. Havess la cumissiun buca capiu d'anflar ed era d'inflamar rehas e bunas persunas per quella aschi sontga e sublima ovra, havessen ils da Rueras forsa saviu spitgar ditg sin zenns novs. Pertgei turnar tier ils vischins cun in niev quen da zenns, quei astgavan ils umens cumissiunai buca far. Ei fuss era stau per ils biars pli paupers vischins memia grev. Gia igl emprem quen ei staus per biars gravionts avunda. Quei stuein nus dar tier, mo quels han buca fatg la canera gronda.

Signur cassier Lucas Cavegn ei sedaus tutta breigia da rimnar daners per nossa ovra. El ha tratg per la cassacca a bein enqualin rehun cun bien success ed era senza. Mo alla finala tonaton anflau quei ch'el duvrava: benefactors per ils zenns sco era per ina ura nova.

Ilz zenns

Sche nus vulessan ussa descriver tut quei ch'ei vegniu s' informau, scret vi e neu en caussa dils zenns mass quei bia memia lunsch. Ei ha dau caussas emperneivlavs e meins emperneivlas. Jeu vi serestrenscher sil principal. Ilz zenns ein i a mi il pli afuns el cor al scribent. Bia notgs han els schau durmir mal.

En la persuna da signur Teofil Locher havein nus anflau ina persuna zun qualificada sco gidonter ed expert. El ei organist ed expert d'orglas e viseta la val Tujetsch gia dapi biars onns. Gia suenter la cumpra dil zenn niev dalla firma Egger ha el dau giu sia critica a pader Baseli Berther. Quella critica ei denton era vegnida ad ureglias ad auters vischins. Buca tuts han tedlau bugen quella critica, denton oz stuein nus dir ch'ella seigi stada giustificada. Quei signur, schegie in protestant, ha fatg fetg bia per nossas baselgias e capluttas e bia per nos zenns e per l'ura baselgia.

El ha per igl emprem fatg per nus in bi plan per ils zenns. Tenor quel duevan els survegnir il suandont accord : as, es, e. In bi tuchiez ed il zenn grond dueva pesar circa 600 - 700 kilos. Quei plan haveva dau ad el fetg bia lavur ed ei staus per nus ina fetg buna entschatta. Igl onn 1928 ei in luvrer dalla firma Rüetschi, Aarau staus a Sedrun per montar in zenn niev pil Sontget dils gedius. La cumissiun da restauraziun dalla baselgia da s.Giachen ha envidau en quel da vegnir a Rueras. Suenter haver giu viu nossa stiva da zenns preparada el clutger havein giu ina uatga ell'ustria. Ad el havein presentau il plan da signur Locher. Suenter haver giu discussiunau empau ha el dau a nus il suandont cussegl. "Il plan da signur Locher ei tut endretg, mo vus vegnis beingleiti a s'enriclar, sche vus mettis buca si in aschi grond zenn sco ei va si. Ord mia experientscha sai jeu attestar quei a vus."

A quei signur havein d'engraziar l'idea d'in zenn cul tun f ed ina peisa da circa 1000 kg. Il zenn f ensemen cun il zenn vegl dil tun b ein stai il fundament per ils zenns novs. Ilz umens dalla cumissiun han scochemai priu en egl la cumpra dil zenn grond da 1000 kg. Ins ha cun interess era observau, che quel ch'era en egl sco padrin dil zenn e donatur vuleva quei zenn. - Mo la caussa era aunc buca madira ed era buca sclarida avunda. Avon ch'empustar ils zenns definitiv ha ei aunc dau da far atras bein enqual lutga.

Gia quei atun 1928 fuva la cumissiun-baselgia serendida sin agen cuost a Curaglia per mirar e tedlar ils zenns novs dalla firma Egger da S. Gagl. Signur caplon Sialm ha dau ina clara explicaziun dils zenns e dalla ura nova. Sche nus vesein oz las uras sin tuttas quater varts ei quei forsa gest il resultat da quella viseta a Curaglia. Havessen ils da Sedrun giu viu l'ura da Curaglia ed udiu il pareri da caplon Sialm, sche havessen els era oz ina ura sin tuttas quater varts dil clutger. Signur Locher lamenta en sias brevs che Sedrun vegli buca metter si ina ura nova. Quella idea ha duvrau bia breigia e perseveronza da sgr. Locher. La finala ha el tonaton anflau grazia, mo ils quater "zeferblats" ha el buca

dumignau. El di: "Con bugen havess ins schau mirar las uras vi Surrein e dils plauns Sedrun oragiu. Oz fagess ins dabot sch'ei fuss aunc da far."

Vegnend quels umens l'auter di da Medel han els visitau ils zenns dalla baselgia da s. Gions a Mustér. Medemamein han els priu enconuschientscha dils zenns da Sedrun. Ils umens dalla cumissiun ein stai pertscharts da lur greva missiun.

Il december 1928 ei il directur dalla firma Rüetschi digl Aarau vegnius tier nus. Sin giavisch ha el miserau e calculau per eventualmein saver surpender da cular nos zenns. Mo la caussa fuva aunc ditg buca preparada per far il contract da cumpra.

Signur Amsler, il directur ed architect dalla sura numnada firma scriva en ina da sias brevs ch'el seregordi bugen da quei di, ils otg da december. Quei seigi stau per el enzatgei tut niev en quella aura da neiv e cufra. Aschia fageva ei quei di en tutta solemnitad. Avon paucs onns per il medem di, la fiasta dall'Immacolata mumma Maria era ei vegniu giu duront viaspras ina lavina ord la Val Mila e scarpau naven in grond baghetg sur la via a Candentschuns. Medemamein veva quella lavina sfraccau in baghetg pli vegl ed ina remisa sut via. Quei suenter ina interrupziun da varga 100 onns. Pli baul haveva la medema lavina dalla Val Mila tarmess ora duas grondas lavinas. Ina igl onn 1749 nua ch'ei haveva custau la veta a 64 persunas. La secunda era vegnida ora igl onn 1817 nua che 27 persunas havevan stuiu schar la veta ella freida fossa. Jeu less denton remarcar che da gliez temps fuva la pli gronda part dil vitg dadens la baselgia e viagiu encunter l'acila da Rueras. Per esser segirs dalla lavina han ins baghegiu silsuenter pli anora las casas. Dis e notgs da grondas nevadas seretilan quels entadem aunc adina anorasi per segirezia. Quei ch'ei stau pusseivel da gliez temps sa aunc adina serepetter.

Returnond signur Amsler a casa ha el beingleiti schau vegnir tier a nus different plans per elecziun da nos zenns. Dils dus zenns existents mesira il grond 57 cm diameter. Quel deriva dalla Firma Egger S. Gagl ed ei vegnius culaus 1926. L'auter zenn sveglia pli bia interess. El mesira 52 cm diameter e lai supponer ina gronda vegliadetgna. Igl ei stau pusseivel d'eruir l'annada, numnadamein 1490. Igl ei strusch stau pusseivel da leger ils bustabs che indicheschan igl onn. Denton signur Amsler cun sia vasta exprienza ha saviu bustabiar il suandont: MCCCCLXXXX. Quei zenn seigi da respectar ord pietad e qualitat, in zenn che hagi battiu 400 onns adina el medem liug. El hagi buca piars il tun e quei seigi ina gronda raritad. Denton ussa hagi el tuttina basegns da volver il battagl. Signur directur propona ils tuns f, as, c cun aunc ils dus veders en fis ed il vegl b. Ils zenns novs vegnessien sin circa 2000 kg. Tras questa cumbinaziun dueva il zenn en fis vegnir ligiaus viaden ella medema tonalitat. Quei ha denton buca plaschiu agl uestg Georgius e lez ha buca approbau quella varianta. Il zenn seigi lavagaus aschigleiti sco ins vegli curreger el. Perquei havein plitard tier il niev cuntract vendiu el alla Firma da sgr. Amsler per 387.- francs.

Il meini da sgr. Amsler havein immediat tarmess a nies um da confidonza, signur Locher. Mo sgr. Locher disputescha quei accord e propona f, as, b. Aschia ei la caussa ida da Rüetschi a Dübendorf e da leu puspei en claustra a Muster ed aschia tratg alla liunga vizeversa. La finala dueva tut quei survivir per vegnir madirs el niebel intent.

In cass che udeva tuttavia buca tier nossa missiun haveva pudiu turbelar in techet la cumissiun. Dafertont ch'entgins s'accordavan cun l'idea da signur Amsler e Locher, haveva il president scret a siu conscolar canoni Caminada e dumandau sche nus astgassien trer en il cussegl da monsignur uestg per cass ch'ins sappi buca s'unir tier in accord. Naturalmein ch'igl uestg ei staus prompts da dar in bien cussegl en caussa. Negin dubitava e sminava quei mument che la finala hagi cheu igl uestg aunc da dir il davos plaid, tonpli che pader Baseli secarteva da haver la lubientscha dalla curia gia tier il project I da Locher.

Suenter ina consultaziun privata d'entgins commembers dalla cumissiun han ins anflau per bien da schar sriver agl uestg per siu cussegl en caussa. Signur president Venzin ha fatg quei. Ditg e liung ha ei cuzzau entochen che nus havein retschiert ina risposta dalla curia. Igl uestg fuva staus in temps absents. Returnond vesa sia grazia nossa caussa buca cul dretg egl e dat a nus sequent cussegl: Da schar cular tier igl existent zenn b d'anno 1490 aunc treis zenns pigns numnadamein: fis, ais, cis.

Arrivond quella brev digl uestg a Rueras ha la cumissiun, quella gada en corpore, teniu ina radunonza. Mo negin ei staus dil meini digl uestg. Il gliendisdis ha sur caplon dau risposta a monsignur. Il cuntegn negativ ei buca staus enconuschents a nus, bein denton igl echo.

La radunonza dalla cumissiun ha lu unanimamein concludiu da setener vid la scala da tuns: f, as, c, suenter che signur Locher haveva tras ina brev discussegliau igl accord f, as, b. Quei accord audi el mintga dumengia e mintga gada fetschi quel mal las ureglias.

La damonda dils zenns era ussa tratga alla liunga gia per meins ora ed ins udeva tscheu e leu: Tgi so, sch'els zains nuvs vegnan betga aun? Beinspert han ins encuret g contact cun la Firma Rüetschi per puder deffinitiv far giu il contract per ils zenns novs. Mo tuttenina vegn igl echo da Cuera. Gling, gling fa il telefon en casa dil Leci e monsignur ei al telefon. Ins sto clamar il sur caplon al telefon. Il bien augsegner ei buca pauc surstaus ch'igl uestg clomi el al telefon. Denton arrivaus, pretenda sia grazia ch'el hagi da vegnir damaun a Cuera per seplidar pervia dils zenns. Nies augsegner saveva dir nuot auter che: Morgens muss ich predigen in Sedrun. Ei era il secund venderdis cureisma che croda da vegl enneu al caplon da Rueras da tener il priedi per la devoziun dils venderdis da cureisma. Essend vegnius dabot al telefon disdeva era il flad. Tuttenina vegn el naven dil telefon e di al scribent: Reisda te! Per romontsch hai jeu allura detg: Sia grazia perdunien, nies augsegner ei vegnius dabot e po buca si cul flad. Arisguard la caussa dils zenns essan nus gia en contractivas cun la Firma Rüetschi. Signur Amsler ei gia staus duas gadas a Rueras. - Monsignor rispunda: Jeu sai che vus haveis fatg ina futscheria, denton selai quei forse aunc remediare. Il caplon ha da vegnir giu damaun. Adie. Suentar quella nova da surengiu era nies bien augsegner sco tuccaus dil tun. Tgei duei jeu ira giu e dir, jeu hai gie giu nuot da dir en caussa. Ti stos vegnir cun mei. Igl uestg cumandava ad el ed el cumandava a mi. Denton hai immediat viu en ch'el haveva raschun. Nus havevan beinduras dumandau el per cussegl, mo el scheva adina: Fagei sco vus anfleis per bien. El scheva mattei in paternies dapli per che nus anflien il ver cussegl.

La risposta ei stada: Jeu ni il cassier Lucas cumpognien el a Cuera. Suentar en casa da Lucas Cavegn ha ei dau ditg da puder surplidar il Lucas d'ira a Cuera cun il sur caplon. Il scribent da questas lingias haveva da cuort fatg atras la grippe. Perina era ei memia riscau la sanadad e per l'otra vuleva il scribent buca ira giu e tener la dira cun il monsignur sco frar e bab da dus spirituals. Per quei eisi stau in grond levgiament cura che Lucas ha dau plaid d'ira cun igl augsegner.

La sera havein fatg il plan co tschintschar cugl uestg. Suentar che igl uestg hagi plidau dumandar il plaid ed allura dir ed insister. Ils donaturs garegien in zenn grond da 1000 kilos el tun f e quel culs auters vegnien culai dalla firma Rüetschi. Da quella firma hagian nus tratg en bia bunas recomandaziuns, da s.Gagl pauc bunas. Duess monsignur insister che nos zenns vegnien culai da Hamm, sche vegnien els a saver dir, che la caussa mondi dalla glatscha giu. Cheu surprandi la cumissiun da baselgia negina responsabladad. Rueras resti lu forse per generaziuns senza zenns novs. Il mument seigi ussa madirs. Treis zenns vegnien pagai da donaturs sch'ei vegnien culai ad Aarau.

Aschia ha lura il Lucas veramein purtau avon l'auter di agl uestg. Vesend sia grazia la posiziun ha el buca vuliu prender sin el la resca da far ira la biala ovra dalla aua giu cun vuler sfurzar da cular ils zenns a S.Gagl ed ha dau la lubientscha da schar empustar els ad Aarau.

Uestg Georgius ha silsuentar era detg il pertgei. El stoppi tener cun la firma Hamm a Staad. Murend igl anteriur cula-zenns Egger ei la fatschenta daventada venala. El hagi cussegliu a sgr. Hamm da cumprar quella fatschenta sinaquei ch'ella vegni en mauns catolics. Havend monsignur schau dar l'idea da Hamm, sesaulz'el e va tier siu clavazin per cumponer nies futur tuchiez, ils tuns denter f da 1000 kilos e b, il respectabel da 1490. Suentar haver empruau sin il clavazin di igl uestg: Elegi quei accord per vos zenns: f, as b, des cun il veder b da 1490. Il zenn da 1926 duei curdar naven. Quel vendei al plevon da Mustér. Cumpignond giadora la viseta di el: Ussa haveis il cussegl da vies uestg, sche vus leis suandar el. Cass cuntrari mirei per tgei uestg che vus vuleis da benedir vos zenns. Quei tunava aschia sco in camond da surengiu.

Cun grond interess co la caussa seigi ida ora ei la cumissiun seradunada senza clamar aunc quella sera en casa dil Lucas. Ins ha tedlau il resultat che fava ius ora per cuntentientscha dils biars. In quitaun dapli ha il cassier giu. El aveva pinau e mirau ils donaturs mo per treis zenns. Igl uestg aveva giu detg: Sche vus pudeis pagar treis, pudeis era sut da pagar il quart. La cumissiun tut leda dad esser arrivada ad in bien resultat ha incaricau il Leci da telefonar a sgr. Amsler. Quei ei daventau l'otra damaun e giu bien cletg d'anflar il signur directur. Mo annunziand la cumbinaziun digl uestg di il directur: Quei capeschel jeu buc. Co sa igl uestg recumandar quei accord. Quei dat ina tartignada. Gie, signur directur il zenn da 1926 croda naven. Oha, lura vegn ei segir endretg. Nus vulein far las preparativas ed era pinar tier il contract.

In di suenter la viseta a Cuera tarmetta igl uestg ina brev al caplon nua ch'el scriva: Essend Els cun lur cumpogn stai naven ier ei a mi vegniu endamen aunc ina megliera cumbinaziun che mass era fetg bein cun il zenn da 1490 e - sche vus elegis quei accord dundel jeu 500.- francs. - Quei accord ei: f, g, b, d cun il zenn vegl b, indichescha: Salva nos Domine. Ussa secapescha ch'ins era per quei accord. Quel plascheva era meglier sin il harmonium e lura aunc il regal da 500.— francs. Aunc in bien padrìn ed il quart zenn fava finanziaus.

Quella sera hai jeu allura puspei telefonau cun sgr. Amsler. Sia risposta ei stada: Gie, quella cumbinaziun ei aunc megliera che l'otra. Sche jeu hai miserau endretg il plaz sche po ei gest en. Denton senza aunc inagada miserar astgein nus buca ughegiar. Tal di sun jeu leu e lu savein far il contract definitiv. - Denton havev'ins era orientau sgr. Locher il qual saveva buca capir ch'igl uestg proponeva igl emprem accord. Ils tuns ais, fis, cis, quei fussi in bi tuchiez en in pign clutger, denton buca adatau per la biala tuor da Rueras. Tier il secund project cun f, as, b, des seigi segir il des dissonanz. Meglier seigi il tierz accord f, g, b, d e b vegl. Sil di fixau ei signur Amsler vegnius tier nus, ha turnau a mesirar la stiva dils zenns e per nies legherment ha el saviu dir: Ei po gest en la davosa cumbinaziun digl uestg.

Silsuenter ei la cumissiun seradunada en l'ustria e fatg il contract per il niev "cul". Ei fava il davos mars e sin il matg proxim havevan ils zenns novs d'esser culai. Il zenn veder da 1926 ha il directur priu encunter per 400.- francs.

Per igl emprem ha ussa la firma Rüttschi fatg e tarmess in plan per la sutga dils zenns.

Quei han allura nies bien Vigeli Beer, construider dalla tuor, cun frars Giossi priu a mauns immediat. Suenter ch' ils zenns ein stai empustai ha ei tuccau da far segir cun ils donaturs. Lavur pia per il cassier Lucas. Il zenn pign haveva la famiglia Derungs empermess da pagar. Mo ussa entras la disposiziun dil monsignur uestg curdava il secund pign alla numnada famiglia. Mo cun quei ein els era stai cuntents schegie ch'ei vegneva ussa pli car. Pli bia ha ei dau da survegnir igl uoppen da famiglia Derungs. Cheu ha il pader Baseli puspei dau bia breigia. La finala ha el survegniu el entras in scolast lumnezian. Numnau pader Baseli haveva era cussegliau da metter igl uoppen da mintga famiglia che paghi in zenn sin il zenn. Pader Baseli ha era preparau las inscripziuns dils zenns e rugadau neunavon ils uoppens dallas famiglias.

Il zenn grond, tun f da 979 kg, dueva survegnir la sequenta decoraziun: D'ina vart il maletg dil sogn al qual il zenn ei dedicaus numnadamein s. Giachen.

Sutvi il text: Da stempraus, lavinas boas e fiug

Nus pertgiri tras tiu sogn riug.

Da l'otra vart il maletg da s. Giachen e uoppen Cavegn. Donaturs la famiglia da Gion Antoni Cavegn. Annada 1929.

Il secund zenn grond, tun g e 705 kg grevs dedicaus al ss. Cor da Jesus. Maletg dil ss. Cor da Jesus. Uoppen Berther. Donaturs artavels da Giusep e Sigisbert Berther.

Inscripziun: En cruschs, contrists en tut plirar

Vegni tier mei jeu vi gidar.

Tierz zenn, tun b, 412 kilos. Uoppen Derungs. Donaturs famiglia Derungs. Maletg: s. Giusep.

Inscripziun: Protegia cheu sin tiara nossa sort e gida nus tier ina buna mort. 1929.

Quart zenn, tun d e 208 kilos. Maletg: s. Antoni.

Inscripziun: Sogn Antoni de Padua

Roga per nus.

Donatur: Monsignur uestg Georgius Schmid de Grüneck.

Pia ei il zenn grond dedicaus al patrun baselgia s. Giachen. Il secund fa endamen ed ei dedicaus a nossa cara confraternitad di ss. Cor da Jesus. Il tierz al grond patrun dalla buna mort s. Giusep. Il quart al pussent s. Antoni. Il tschunavel dueigi esser dedicaus a Nossadunna Maria.

Il premurau pader Baseli fa attents nus da po mirar suenter che negins sbagls seschluetien en las inscripziuns e decoraziuns. Perquei intent ha la cumissiun tarmess sgr. Locher il mument che tut fuva pinau tier per il cul. Numnau sgr. ei ius atras ed anflau neginas errurs e dau a nus novas.

Entuom miez matg ei il cul staus preparaus e sgr. Amsler ha envidau la cumissiun da vegnir e mirar. Quella invitaziun han suandau: Vigeli Venzin e donatura vieua Onna Maria Derungs. Scribent fuss era bugen ius a mirar quels ton desiderai zenns mo ei muncava ils raps. Plitard han Lucas Cavegn e Giachen Fidel da frars Cavegn aunc fatg ina viseta e purtau bunas novas. Ils zenns novs inaga montai vegnien aunc a far bargir. Quei ei era stau verdad, perinaga tier il scribent la segira verdad.

Monsignur vuleva ch' ils zenns restien sco els vegnien ord la caldera. Senza nuot schubergiar, quei seigi il meglier. La firma encuntercomi scheva che quei detti donn nuot zun al zenn da schubergiar. Sinquei ha la cumissiun giu radunonza e concludiu da surschar quei alla firma. Tier la visitaziun ei il monsignur era buca turnaus cun quei meini schegie che tut era schubergiau en uorden.

Ussa eran ils zenns pinai tier per la spediziun. Mo els stuevan aunc far atras l'expertisa. Perquei intent haveva la cumissiun supplicau signur Teofil Locher e plevon sur Fetz da surprender per ils vischins da Rueras l'expertisa. Il monsignur da sia vart haveva dau ad in pader da Nossadunnaun da surprender per el l'investa.

Tenor il rapport da pader Joachim Gisler agl uestg Georgius ein ils dus zenns g e d totalmein gartegiai. Dils dus auters f e b maunchi in techet il terz. Denton a tuccond vegni negina ureglia ad udir ora enzatgei. Ils tuns f e g, essend aschi vischin in da l'auter, vegni il tun pli ferm, il qual prendi ora stupent tier il tucchar d'ensemien. Insumma ins sappi taxar en general ils zenns per gartegiai.

Rapport dall'expertisa entras signur Locher

Per la baselgia da Rueras-Tujetsch ei vegniu culau dalla firma Rüetschi Aarau in tuchiez cun ils suandonts tuns: f, g, b, d, cun il zenn vegl da 1490. Il zenn dalla firma Egger ch'era culaus fetg mal ei exclaus e surdaus sco material alla firma Rüetschi. - Il cul dils zenns ei daventaus venderdis ils 14 da matg 1929. - Il metal era schubergiaus e preparaus da maniera ch'el ei vegnius bials alvs e tarlichonts ord il fuorn. Las decoraziuns ed inscripziuns ein totalmein gartegiadas ed han duvrau negina ulteriura reparatura. Tuts quater zenns ein gartegiai fetg bein quei che pertucca il tun. Il zenn g san ins prender per in dils megliers en Svizra. Ei vegn ad esser in tuchiez ch'ins auda lunsch entuorn ed els vegnan ad ir bein a prau culs zenns da Sedrun. In fetg emperneivel sunem per l'entira Val Tujetsch.

Aschilunsch il rapport da nies um da confidanza sgr. Locher.

Daferton ch' ils zenns vegnevan culai, preparai ed era examinai ad Aarau fuv'ins era buca stai lischents a Rueras. Ins vuleva retscheiver ils zenns vengonzamein ed era aschi pompusamein sco pusseivel. Las finas manutas havevan gia daditg luvrau e sacrificau bein enqual sien per saver engarnir baselgia e zenns cun rosas e tshupials. Il chor da baselgia haveva gia igl unviern ribau viaden per quei di ina messa nova dal cumponist Löhle sco era in per adattadas canzuns.

Suenter ch'ei era buca stau pusseivel a monsignur uestg da vegnir a benedir nos zenns in firau ni dumengia han ins buca bugen stuiu acceptar in luverdi, numnadamein: ils 28 da matg 1929.

In di commemorativ per il vischinadi da Rueras. Quels dis avon la fiasta havein dau bia da pinar tier, da tuttas uisas. En igl iert da Duri Vigeli Schmed ussa Cavegn era ei vegniu eregiu in indrez da metter si ils zenns. Quei haveva duvrau enzatgei massiv. Buoras agradsi ed in quader surenvi da maniera ch'ins seigi segirs da pender vidlunder 2304 kilos. Quei plaz era preparaus entadem igl iert aschi ch'ei resti dadens aunc plaz per ils padrins e madretschas dils zenns. Da leu anora ei vegniu fatg plantschiiu per igl uestg ed ils spirituals che gidavan igl uestg. Per ils ulteriurs plevons havevan ins schau far dus bauns novs che fuvan postai dretg e seniester. Las supias pulstras per igl uestg e ses ministrants haveva la venerabla claustra empristau. Ins haveva era stuiu far empristar la faria in per "rauhfas", essend destinau per mintga zenn siu agen intschenser. Per mintga zenn siu agen d'intschensar, per mintgin siu agen schuaun. Igl ei perscret che mintga zenn stoppi vegnir lavaus dadens e dadora cun aua benedida. Quella lavur han fatg il plevon da Tujetsch e quel da Muster. Ei ha duvrau aunc differentas caussas ch'ei a mi buca pli en memoria.

La benedicziun dils zenns

Ed ussa lein s'approximar alla fiasta sezza. Ils quater zenns ein arrivai ad uras alla staziun a Sedrun. Il di avon la fiasta ei per regla era viaspras solemnas. Tier quella fiasta denton ei stau in auter act commemorativ. Il til dils zenns da Gonda a Rueras. Perquei intent ein suentermiezdi la cumissiun en corpore seradunai sin la staziun a Sedrun cun ils treis cavals avon maun a Rueras da lezzas uras. Els fuvan ornai cun fluras per trer las caras bialas cargas al liug. Sche jeu fetschel ussa in cumpliment a quels treis animals cun sias noblas cargas sche daventa quei perquei che gest quels treis havevan runau biaras e grevas cargas per quei intent.

Vegnend il til dils zenns dils plauns neuaden han beingleiti ils dus zenns sin la tuor schau udir lur beinvegni. Els eran buca schalus, schegie che per in era la sentenza da sparir. Udend quei tuchem ein ils vischins ord tuts cantuns curri neutier per mirar e beneventar ses novs convischins dad aschi gronda muntada. Il sgr. directur cun in luvrer han lu tratg si cun nies agid ils zenns e fermau vid il liug preparaus per la benedicziun. Las mattauns han seduvrau da garnir e preparar festivamein. Zenns ed indrez ein vegni surtratgs cun tschupials e flurs da tuttas uisas.

Bia da plidar e panzar veva il gentar dau. Tgi manegiava ei cunvegni da dar gentar agl uestg e spirituals en casa pervenda ed als seculars en l'ustria. Cheu ha allura il plevon resignau a Camischolas, sur Tumaisch Berther, dau la decisiun. El ha numnadamein detg al sur caplon: Il gentar auda da far per tuts ensemen. Uestg, spirituals padrins e madretschas dils zenns, quei ei tut ina famiglia che auda ensemen quei di. Fagei il gentar en l'ustria. Sinquei ei il sur caplon, liberaus da quei darschalet, immediat serendus tier igl ustier e detg: Ti stos surprender il gentar per tuts. Da cuschinar il gentar ha lura la feglia digl ustier Leci surpriu. La Barla Catrina Brugger che haveva gia pliras gadas cuschinaru pigl uestg e bia spirituals. Quei problem fuva ussa sligiaus. - Ussa finalmein il di da fiasta!
continuaziun suonda

La cumissiun haveva aviert si omisdus egl e viu igl um che surprindi da menar il monsignur uestg en auto dalla staziun da Muster a Rueras. Quei um che ha fatg quei ei stau signur dr. Leo Condrau. Bugen ha el surpriu quella honur anen ed anora e quei tut per nuot.

Entuorn las nov e mesa spetgav'ins il signur, igl ault sacerdot a Rueras. Essend nies caplon Venzin quei di empau maldisposts ha sur canoni Brugger arranschau la cuminonza da cristifideivels. Els ein i encunter en processiu cun crusch e cafanuns.

Nies caplon ei lu sefatgs si e retschiert igl ault pastur sin porta-baselgia. Dafertont cantava sin lautga il chor baselgia. Igl uestg conta ils versichels ed usitadas oraziuns. Il chor rispunda cun accumpignament dall'orgla.

Silsuenter tuorna il monsignur ord baselgia e passa avon ils zenns novs. Cun siu instrument special emprova el in zenn in suenter l'auter e constatescha ch'els seigien gartegiai endretg. Returnaus en baselgia havevan il sur canoni cun ils dus diacons, caplon da Sedrun sur Raghet e nies convischin sur Sep Antoni Venzin pinau tier e sevettstgi en ornat da fiasta. Il sur canoni Brugger ei lu suenter igl evangeli seviluts enviars il pievel e fatg beinvegni al monsignur uestg ella baselgia da s. Giachen. El ha era gratulau a ses convischins per la gronda e rara fiasta dalla benedicziun dils zenns. - Il chor baselgia ei sespruau da schar ora siu saver suenter il premurau exercezi sco gia sura menziunau.

Immediat suenter messa ha la benedicziun dils zenns priu sia entschatta. Schegie in luvardi eran tuttina bia gliud serimnai a Rueras. Per embellir la fiasta e per dir a Sedrun che nus audien atgnamein ensemen, havev'ins envidau la societad da musica Sedrun.

Dils spirituals envidai che han buca saviu vegnir essan stai fetg mal. Principalmein per pader Baseli che fuss vegnius aschi bugen, mo staus impediud muort malsogna. Siu frar sur Tumaisch Berther ha muort fleivlezia era buca ughegiau. Ord medem motiv ha era sur Moritz Elvedi caplon a Selva buca saviu esser presents alla fiasta.

Tenor ordinaziun da papa Innocens ils XIV ei il benedir ils zenns plitost la caussa dils uestgs. Cura ch'igl uestg ei staus avon ils zenns ha el recitau ils psalms 50, 53, 56, 66, 69, 85 e 129. Finida la recitaziun dils psalms benedescha igl uestg sal ed aua. En quella oraziun roga il celebrant che Niessegner vegli benedir cun forza supernaturala quella aua ed entras il s. spert sinaquei che quei zenn che seigi benedius e lavaus cun quella aua possi clamar ils affons da Diu tier il survetsch divin. Dapertut nua che quei tun penetreschi dueigi star dalunsch la pussonza dil malvugliu cuntrari da Diu. Medemamein possi quei zenn tener naven l'umbriva dils nauschasperts, dil cametg e tun, dalla forza dil stemprau ed aschia vinavon. Suenter ch'el sal ei staus mischedaus cun aua ei il zenn vegnius lavaus dadens e dadora cun quei sal ed aua benedida e lura schigentaus giu cul lenziel. Duront quella cerimonia ura igl uestg puspei ils psalms 145, 146, 147, 149 e 150. Stada finida la recitaziun dils psalms unscha igl uestg en fuorma d'ina crusch il zenn cun ieli dils malsauens. Lura fa igl uestg puspei ina liunga oraziun. Suenter schigenta igl uestg sez giu

la crusch cul lenziel. Ussa intonescha el 1' antifona e psalm 85. Duront ch'ei vegn urau quei psalm fa igl uestg cugl ieli dils malsauns siat cruschs dadora il zenn e quater dadens cun crisam. El pronunziescha ils plaids: Quest zenn seigi benedius en num dil sogn Bab, dil sogn Fegl e dil sogn Spert en honur da sogn Giachen. La pasch seigi cun tei.

Lura fa igl uestg puspei oraziun. Finida quella metta el il vischi d'intscheins la mirra e tschenta lura il vischi sut il zenn en sinaquei ch'il fem cun il fried dalla mirra mondi si egl intern dil zenn. Duront conta il chor: 0 Diu, quei che ti fas ei sogn. Tgei Diu ei gronds sco nies Diu? Lura suonda il psalm 76.

Igl uestg fa puspei ina oraziun. Silsuenter conta il diacon igl evangeli tenor s. Lucas. Suenter betscha igl uestg il cudisch dils evangelis e la funcziun ei finida. Quei ei stau la benedicziun d'in zenn. Il medem ha ei tucchau per ils auters treis zenns novs. Sulettamein ils psalms ein vegni recitai mo ina gada per tuts. Las autras ceremonias ein vegnidat fatgas denter en per mintga zenn sco sura descuret. Stadas finidas las sontgas benedicziuns han ils musicants aunc concludiu cun sunar in per bials tocs. Suenter ei il monsignur cun ils reverendi augsegners, padrins e madretschas vegni accumpignai tier l'ustria dalla Posta. Leu veva la Tina preparau il gentar da fiasta.

Duront il gentar eisi stau fetg famigliar cun igl uestg, augsegners e seculars. Sur Tumaisch haveva giu raschun da dir: Quei auda tuts ensemen. Padrins, madretschas, che havevan gronds sacrificis, ils umens dalla cumissiun, il sgr. president communal Felici Monn, che haveva mussa dus teaters en favur da s. Giachen, a tut quels ed era als auters ei bein stau da cuvire quella uriala cugl uestg. Duront il gentar ha nies sur Venzin fatg ina ovaziun agl uestg sco autur e cumponist dils tuns dils zenns ed era sco benefactor dil niev zenn pign. Sinquei ha era monsignur priu il plaid. Denter auter di el ch'el hagi buca giu temps d'ira ad Aarau tier l'expertisa dils zenns. Mo el hagi tarmess en siu stagl il pader Gisler da Nossadunnaun. Ils zenns sappien ins prender per gartegiai, schegie che nus hagian buca dil tut suandau el.

Quei havein capiu aschia. El havess viu pli bugen ch'ils zenns fussien vegni ord la furnascha da Hamm a Staad.

Denton fuvu il Chor baselgia seradunau giusut casa e cantau in per bialas canzuns empridas aposta per quei di festiv. Allas duas suentermiezdi ha igl uestg bandunau nus. A Camischolas ha el fatg retener igl auto per salidar siu vegl conscolar plevon resignat sur Tumaisch Berther. A quel ha el exprimiu cuntentientscha culs da Rueras. Ils 19 d'uost 1931 ei sur Tumaisch morts. Tier il grond conduct da bara havein era giu viu per la davosa gada igl uestg Georgius. El haveva era vuliu cumpignar siu conscolar sin santeri. Monsignor uestg ei morts ils 6 da matg 1932.

Cheu suonda ussa la gliesta dils hospis da gentar:

Monsignor uestg Georgius
siu secretari Braham

Canoni Giusep Aluis Brugger
Pader Baseli Berther, malsauns
Sur caplon Gion Antoni Venzin
Segner farer Giachen Antoni Fetz
Caplon da Sedrun sur Luregn Raghel
Sur Moritz Elvedi, caplon a Selva, malsauns
Sur plevon da Conters Sep Antoni Venzin
Sur Tumaisch Berther, malsauns
Sur caplon Placi Sigisbert Giger, malsauns
Sgr. benefactor Thomas Locher, impedius
Sgr. directur Amsler
In luvrer da quella firma
Sgr. president communal Felici Monn
Scolast e dirigent dil chor Barclamiu Peder, scolast
Sep Mudest Nay, scolast secundar
Benefactura Onna Maria Derungs
Meister impressari Vigeli Beer
Meister miradur Luis Zazzi
Padrin dil zenn grond Cavegn Giachen Antoni
Madretscha dil zenn grond Cavegn Culastia
Padrin dil secund grond Berther Baseli, Dieni
Madretscha da quel Berther-Gieriet Cualstia
Padrin dil tierz zenn Derungs Casper
Madretscha Derungs Rosa
Padrin dil quart zenn Curschellas Gion Antoni
Madretscha Venzin Turte
President dalla cumissiun Vigeli Venzin-Giger, buca vegnius
Cassier Cavegn Lucas
Actuar Cavegn Leci Antoni
Lennari Gion Antoni Berther
Meister fravi Giachen Lorenz Caduff
Caduff-Bigliel Gion Fidel, maldisposts
Ustier Leci Antoni Brugger, ha giu da trer la groma!

En tut 27 personas, 7 spirituals.

Duront il gentar ei vegniu legiu avon in telegram da sgr. mistral Vigeli Berther che fuva ual a Cuera sil Cussegl grond.

Cuera, ils 28-5-1929

Vischinadi Rueras, Sedrun

Cordiala gratulaziun al vischinadi Rueras tier la benedicziun dil niev tuchiez,
per sias grondas prestaziuns

Vigeli mistral

Plinavon ei vegniu legiu avon ina poesia da pader Baseli Berther. La malsogna haveva bein pudiu impedir il tgierp da vegnir tier nossa fiasta e selegrar cun ses vischins. Il tgierp a Muster en claustra, siu spert a Rueras. Lein schar suandar la poesia:

Salid als stimai convischins sin la fiasta dalla benedicziun
dils zenns novs a Rueras, ils 28 da matg 1929.

Quitaus unfrendas bia lavur
Quels onns sogn Giachen ha purtau
Magari aunc enqual snavur
Denton tier nova veta leventau
Teschamber, tuor, tut niev vesein
Ed oz d'in niev, sonor tuchiez
Da cor nus tuts er'selegrein
Legria regi en vies miez
Pertut al Segner engraziein. Pader Baseli

Il signur plevon Giachen Antoni Fetz haveva era duront gentar gratulau per il niev tuchiez e saviu dir enzatgei dapli. El era gie era staus admess tier l'expertisa ad Aarau. Ils cuosts pil gentar han muntau 271.35 francs. Il local, la breigia digl ustier ei buca vegniu quintau, sulettamein ina pintga gratificaziun alla cuschiniera.

Ussa aunc in capetel sur dils padrins e madretschas. Gia avon la benedicziun dil zenn da 1926 fuva la cumissiun stada radunada en casa da Leci ustier e discurriu la damonda d'in padrin e d'ina madretscha pil niev zenn. Suenten ina discussiun pli viva han ins surdau a Baseli d'ira en ina casa e dumandar madretscha.

Mo returnond il Baseli era el fetg consternius. Aunc mai negin sin tiara, mo na, nus vulein dir en Tujetsch haveva survegniu ina tala barschunada. Il spert religios da nossa vallada ha adina considerau il gidar a tener si il s. batten ad in niev naschiu per ina gronda honor e tut che augurescha aunc ozildi ventira e benedicziun a padrins e madretschas cun lur novs figliols, era a quel ni quella che ha in zenn per figliel. Nus confirmein il sura scret cun ina historia.

Giudem il vitg habitava d'in temps in cert Victor. Nus dad oz havein buca enconuschiu el, mobein ses affons. In di ch'el era tut persuls en stiva vegn siu vischin tier el e damonda: Vulessas Vus buca far aschi bien e gidar a tener si il s. batten, nus havein in niev naschiu. Victor fuva plitost in strolì ed adina pinaus da far spass. Tgei, jeu padrin, quei fagei buca far mei, mirei enzanua auter per in meglier. Mobein, roga il bab, fagei quei survetsch per l'amur da Diu. Sinquei vegn la dunna dil Victor. Ella haveva udiu tut. Mo temas ti buca che Niessegner strufegi, quei ei tonaton buca survetschs ch'ins di na. Gliez schon buca, di il strolì, mo jeu tertgavel ch'ins stuessi schar rugar da retschiert, per far la caussa endretg. Dil rest fetschel jeu bugen.

La numnada cumissiun-baselgia ei lu sevolvida tier Turte Venzin per madretscha e tier Gion Antoni Curschellas per padrin. Quels dus han gidau cun plascher e regalau lur figliol cun 300.– francs per in.

Vegnend quei zenn da 1926 denton exclaus dil niev accord e vendius ha la cumissiun elegiu puspei ils dus sura per il quart zenn niev. Ei fuss stau mitgiert ed ina speculaziun da daners sch'ins havess priu en egl auters.

Per ils ulteriurs zenns ha la cumissiun buca giu da haver quei quita. Quels che pagavan in zenn savevan denter els destinar padrin e madretscha sco ei levan. Sulet tier il secund havess la cumissiun ed era il car pader Baseli viu bugen che Duri Battesta Berther havess en uniu cun sia sora Culastia pagau quei zenn dalla confraternitad dil ss. cor da Jesus. Ses geniturs havevan giu pagau tier la cregida dalla confraternitad la biala statua dil ss. cor da Jesus che dueva da lezzas uras ver custau 300.– francs. Ch'ins ha buca pudiu surplidar numnau da pagar miez quei zenn ha la cumissiun scret tier al vent che suflava leu el contuorn.

Surprendend sin quei Baseli Berther e siu quinau Vigeli Monn da Sedrun da pagar quei miez zenn cun Culastia Berther ha s. Giachen giu negin donn e nus pudein bugen cuvir sch'ina outra baselgia ha profitau.

Duri Battesta Berther ei morts da Nadal 1933, tenor il mesirar dils carstgauns beadamein. Ils artavels da Giusep Berther, ch'ei morts igl onn 1925, han pagau la mesadad dil zenn dil ss. cor da Jesus. Tgei legherment vegness il Sep da Dici ad haver da quei niev tuchiez?

Contas gadas haveva il scribent da questas lingias e Sep da Dieni plidau ensemen sur la pusseivladad d'in meglier tuchiez. Ina vergugna, scheva el, per in vischinadi sco Rueras da buca ver in meglier tuchiez. Quei seschass tut far cun la bunaveglia ed unitad. Giusep Berther da Dieni era gia avon che questa ovra vegni entschavida ius tiel Segner. Ses dus sur frars Tumaisch e pader Baseli han aunc in per onns surviviù ed udiu ils zenns novs. Jeu audel quasi aunc adina il sblazzar ed il bravo da legherment cura che pader Baseli ha enderschiu ch'il zenn veder seigi constataus segir digl onn 1490.

Igl ideal ed il basegns da megliers zenns havevan aunc plirs bravs vischins nutriu ed era exprimiu. Tenor ina quittance en mauns dil sgr. cassier e suttascreta digl ugau baselgia Vigeli Venzin-Giger haveva Duri Vigeli Schmid, che habitava il pli damaneivel dalla baselgia fatg si 100.— francs per cass ch'ei vegni in di fatg si novs zenns. Il Segner detti ad el il tscheins leuvi.

Nus stuein turnar anavos tier la fiasta. Havend il monsignur uestg bandunau Rueras ei tut il pievel seconcentraus entuorn ils zenns. Tut che leva mirar co quels colos mondien si en la tuor. Il directur Amsler cun siu luvrer havevan fatg prescha suenter il gentar dad ira e ranschar en la suga, ina mecanica che haveva aunc tratg si matei biars ina ga ni l'autra. Il ter sin clutger ils zenns seigi dapertut moda ch'ins laschi ter si ils affons da scola. Igl affon da sis onns sa lura raquintar, sch'el vegn sin 80 onns. Per lezza generaziun ei quei lura ina raritad. Ei era veramein in bi mirar ed ina gronda fiasta pils affons, cura ch'els tut en retscha maven dil vitg ora targend per la suga. Quels oradem sin camond puspei entadem ed aschia vinavon. Fertion ch'ils zenns sesalzavan plaun plaun en la tuor. Buca mender ha ei era plaschiu als affons ed era aunc perfin ad enqual carschiu las canastras biscuits ch'ins ha silsuenter repartiù ora als affons per memoria e pagaglia da trer si ils zenns. Il cassier ha cheu in quen presentaus e pagaus ad Albert Cavegn da Sedrun per 250 metgas a 15 raps 37.50 francs.

Milsanavon ha il cassier pagau in quen da 22.80 per il da beiber als musicants da Sedrun per gidar ad embellir la fiasta. Inaga ch'ils zenns ein stai si han ils luvrers seduvrau da metter els mintgin en siu post predestinau.

Cun desideri e tschaffen ha tut spitgau vess quei onn il di dil Sontgicrest da Rueras che curdava quei onn sin ils 2 da zercladur. Nies fautor dils zenns sgr. Teofil Locher era semtgau sisum il vitg cura ch'ei ha entschiet a tucclar: b,d,b,g,f, il grond il davos. Veramein maiestus! Fertion che quel speras bargeva larmas da legherment, semeina suenter silenziosa tedlada sgr. Locher tier scribent da questas lingias e di cun fatscha e bucca rienta: Tut ei endretg, tut gartegiau, negina ureglia sa prender ora la pintga munconza.

El decuors da quella primavera han biars admirau ils bials zenns. Segner farrer Fetz ei in di vegnius cun auters treis spirituals duront rusari. Stau finiu han ei cummandau da tucclar festivamein. Il niev tuchiez ha plaschiu a quels augsegners fetg bein. Ei era il

Ed ussa da Rabius, sur Capaul, il da Breil, sur Benedetg Venzin da Selva ed il plevon da S. Murezi, sur Soliva.

Ed ussa car lectur, avon che intrar vi tier ils quens dils zenns ed ura nova aunc in per remarcas. Duront il baghegiar ei vegniu criticau e plidau da tuttas uisas. Vulein citar mo aunc in per exempels. Contas gadas han ins udiu: Il teschamber la finala mas aunc, mo la tuor, gliez ei in luxus. Ina persuna schevi: Ils daners ch'ins sto impunder perquei ei grad sco da better giu ell'aua. Puspei in'otra persuna scheva: Zenns vevan nus schon, plitost in'ura. Quella persuna ha veramein duvrau pauc ils zenns. In auter scheva: Tgei duvravan nus zenns? Ina ura sco giu Minca che havess dau l'ura ed ils quarts, gliez schon. Mo sin tgei schar pitgar il marti, sche buca zenns? Forsa sil tappun pegna, ti lappun. La tuor ei luxus! Sche quei ei ver? Lu ein ils perdavons stai ortgs e tups han els gie baghegiu tontas baselgias e capluttas mo en nossa vallada. Sche nus considerein tgei nos perdavons han prestau e fundau, sche stuein nus haver per els nuot auter che engraziament e stema.

Il spert cristian e religius ha schaffiu caussas en honor da Diu che nus stuein admirar. Ein quels tuts stai ortgs? Ora el mund han els baghegiu las pli bialas e custeivlas baselgias, ornau ellas e sulerau statuas ed altars cun il pli fin aur ed argien. Scribent da questas lingias ha gudiu neginas scolas aultas, mo duront la liunga veta catschau bia il nas els cudischs e contas gadas legiu: A Diu dueigies dar mo il meglier dil pli meglier ed aunc quei ei nuot visavi quei che Dieus meretta.

Nus legin era che Dieus hagi gia a Moses el Veder testament cumandau da construir trumbettas per clamar ed animar il pievel da Diu tier il s. survetsch. Tgi ch'ei stau igl inventader dils zenns ei buca enconuschent. Dus loghens disputeschan dad haver giu ils emprems. Sco Dieus ha da surengiu avisau Moses da construir trumbettas, aschia vul la baselgia ch'ils zenns vegnien mess si egl ault, sin clutgers e tuors e che lur tun vegni da surengiu tier ils carstgauns. Els ein la semeglia dalla vusch da Diu. Sco lezza cloma, cloman ed animeschan era ils zenns tier oraziun. Els annunzian tut ils eveniments dil carstgaun: la naschientscha, la creisma, las nozzas e la mort.

Car lectur! Ussa capin nus il pertgei la s. baselgia ordinescha tontas ceremonias ed oraziuns per la benedicziun dils zenns. Nus savein capir, ch'il papa ha destinau sepudent mo igl uestg per quellas sontgas funcziuns.

Manegias ti era che la tuor seigi in luxus che dat tetg a quels sogns e nobels campions? Scribent era fermamein perschadius ch'era l'otra part havess acceptau il regal dils zenns cura ch'ei vegneva tut per nuot. Mo nua pender si els? Vulev'ins forsà supplicar il Fidel, il Giusep ni forsà il Paul da schar pender si els el giebel da lur clavaus? Na, miu amitg. Lura havess ins survegniu negin uestg e spiritual che havess benediu ils zenns. Havend denton ils vischins da Rueras gia ordavon preparau e baghegiu la tuor, ina habitaziun vengonza allas devoziuns oraziuns e benedicziuns ch'ils zenns han retschiert, sco haveis udiu cheu avon, aschia stuein bein dir: La tuor ei pils zenn negin luxus, ed ils zenns audan ella tuor. Jeu hai visitau il car pader Baseli paucs dis avon sia mort e quei

ch'el ha detg sin pugn da mort dueigi esser mess cheu en memoria: Vus da Rueras, ha el detg, haveis scaffiu in'ovra che resta, num ina disgrazia, generaziuns per il laud e honur da Diu, pudeis buca engraziar avunda a Diu. Il medem patratg a el vuliu che seigi gravaus el zenn grond da s.Giachen: Da stempraus, lavinias e fiug. Nus pertgiri tras tiu sogn riug.

Prendend cumiau da nos augsegners da Dieni vulein avon ch'ir vinavon cun nossa lavur aunc seregurdar dils auters augsegners da nies vitg. Els prendan era viva art e part da nies far e patertgar. Sur canoni Giusep Aluis Brugger ha giu sia messa nuviala igl onn 1895 ils 15 d' uost ella baselgia parochiala a Sedrun. La dumengia sisura eis el vegnius tarmess provisor a Trun e staus silsunter 17 onns plevon da Trun. 1912 ha el giavischau digl uestg da brattar faria da Trun cun Mustér, nua ch'el pastorescha cun s.Martin 1934 gia ventgadus onns sco plevon e vicari episcopal.

Il nevs dil sura, canoni Maurus Giusep Brugger, ha giu sia messa nuviala ils 16 da fenadur 1926. Sunter la messa nuviala ha il sura aunc fatg treis onns studi e lu vegnius tarmess per in onn a Tavau. Silsunter elegius plevon a Surrein-Sumvitg. Igl onn 1927 ha sur Sep Antoni Venzin Rueras giu messa nuviala. El ei suenter in onn el seminari vegnius tarmess sco plevon a Conters e remplazzau sur Gaudenz Elvedi da Surava, il nunemblideivel plevon da Tujetsch duront varga 25 onns. Igl onn 1933 a sur Sep Antoni brattau Conters cun Surcuolm. Igl onn 1934 ha il car augsegner piars en paucs meins ses geniturs. Ton dalla messa nuviala dil sur Maurus sco dil sur Sep Antoni han ses convischins da Rueras priu devoziusa art e part e nuota schau muncar per embellir las fiastas. Paucs onns suenter ha Rueras puspei selegrau da haver in dils ses giuvens sco niev pader a Mustér. Numnadamain Flurin Berther da Paul Giusep Berther e Maria Ursula Berther-Venzin. El ha giu messa nuviala 1931 ils 17 da matg e survegniu il num Placi. Fertont che scrivel questas lingias porta la Gasetta Romontscha che pader Placi Berther seigi vegnius elegius dil convent sco staltalter. Ina honur, mo era in bien e heicli uffeci!

Il settember 1934 ha in cuserin dil sura pader Placi bandunau nus da Rueras per empruaur l'aria claustrala sco noviz. Nus augurein ad el ch'el possi star ora l'emprova e daventi in bien pader. Siu num ei aunc ussa Baseli Berther. Ina sia sora ei gia biars onns en claustra. Sche nus havein numnau ils giuvens ch'ein sededicaì al stan spiritual vulein era gest menziunar las giuvnas. Ultra dalla sura allegada havein aunc quater muniessas da Rueras. In'Amanda Muggli ell'America, duas soras Deplatz medemamein muniessas ell'America e lu l'Anastasia che ha giu profess 1934 e survegniu il num Maria Elisa. Anastasia, Marghetta e Marta Deplatz, treis soras ord ina famiglia! Havein vuliu mussar si e perschuaader cun nies fleivel inteletg che tut quei che savein far per la honur da Diu seigi negina luschezia, che tut quei che savein far - gie era buca ils cuosts per la tuor per la casa da Diu. Ina luschezia ein denton ils spirituals d'ina vallada, d'in vitg. Quei ei ina tuor che tonscha tochen tschiel che ha di per di contact cun il parvis entras il sogn sacrifici dalla s. messa.

Quella ventira da biars e buns spirituals ei buca mo da scriver tier als geniturs dils spirituals, mobein buca il davos alla biara e ferventa oraziun dil bab spiritual dil liug, sco

era all'oraziun da biaras bunas olmas cristianas. Sche Rueras ha spirituals e muniessas astgein nus segir scriver tier all'oraziun da nies bien augsegner sur Antoni.

Avon che cuntinuar cun nossa lavur aunc ina caussa per memorisar. Avon havein bein scret tgi ch'eran stai ils benefactors dalla statua dil ss. cor da Jesus. Quest onn 1934 havein giu per la fiasta annuala dil ss. cor da Jesus ina nova biala statua en processiun. Puspei in mied extern per far nossa fiasta pli biala. Pil benefactor ch'ei buca enconuschents tier la benedicziun dalla statua ha igl augsegner fatg dir tschun paternos. Buca ditg suenter ei vegniu tschentau si ina statua da s. Antoni el chor da maun seniester. Per la statua da s. Antoni ei vegniu tratg si ina collecta en baselgia.

Davart ils quens

Il quen dalla Firma Rüetschi Aarau ha viu ora sco suonda:

4 zenns, peisa totala 2304 kg, à frs 3.75	8'640.-
Divers material per indrez da tuccar	1'200.-
Per rugalar il zenn vegl	140.-
Diversas, spesas	77.-
Total	10'057.-
Retschiert per zenn da 1926	400.-
Resta da pagar alla sura firma	9'657.-

La supia dils zenns ei vegnida construida tenor plan da signur directur Amsler da nos scrinaris indigens, Vigeli Beer e frars Giossi Rueras. Ils cuost exacts per quella lavur, sco era per las schalusas ein a mi buca enconuschents. Muncond a mi ils plans da sgnur Hardegger ed auter material che sesanfla els mauns digl ugau-baselgia Vigeli Venzin eisi a mi buca pusseivel da dar cheu in perfetg quen.

Arisguard l'altezia dalla tuor sundel s'informaus aschia: dus meters ei fundament, 14 meters dal plaun tochen si tiel lenn, 2,50 meters la stiva dils zenns e 10 meters da leu tochen si tier la crusch. Total pia cun la crusch ca. 32 meters altezia.

Ina nova ura

Igl um che baghegia vegn pertschards ch'ina lavur cloma l'otra. Aschia eisi era stau cun las lavurs vid la baselgia. Strusch ein stai si el liug ils zenns novs, ch'ins ha entschiet cun il studi per ina nova ura. Gia nos vegls perdavons havevan giu mess neu ina ura sco ins construeva da lezzas uras. Ils onns da nossa giuventetgna mava quella ura denton buca pli. Per cura ch'ins era carschius ha nies bien amitg Giachen Lurenz Caduff giu la curascha d'empruar da far ira ella puspei. Quei ei era reussiu ad el, sco fravi e miez mecanist. El ha era buca mo pinau si ella, mobein adina unschui e rugalau ch'ella mondi e detti endretg las uras (mo l'ura mintgamai e buca ils quarts). Quella ura era da lezzas uras stau in grond progress e nus capin oz era pli tgunsch il desideri suenter ina ura - baselgia. Ina veglietta empau malsauna haveva detg cura ch'ins ha muort la lavur stuii allontanar l'ura veglia: O, schei buca star memia ditg senza ura-baselgia. Igl ei aschi grev la notg cura ch'ins sa buca durmir.

Ina outra veglietta ha mai propi capiu l'ura, ils quarts pertgei ella scheva: Jeu sai buca tgei tartignem ei han fatg cun l'ura, ins sa nuota pli schei dat ils quarts ni las uras. Ella ei morta senza capir l'ura nova e siu dar las uras. Quella ura sco era ils zenns vegls dueigien esser vegni transportai neu dil Valleis, sco ins ha adina udiu. Tgei fastedis quei fuva da lezzas uras senza vias e mieds sco ozildi. Mo quei che mava per la honur da Diu era mai memia grev per nos perdavons cun in bien spert religios. Ins patratgi tgei stentus viadi ins fageva d'ira cun processiuin da Sedrun sil s. Gotthard. Tier quella processiuin stuevan tuttas famiglias tarmetter in commember ni pagar ton a ton e far ira in auter per ella, sche quella famiglia pudeva buca ira ni fuva impedida. Era discurrevan ils vegls, che sur Hospental tier ina pausa, partevi ils statalter ora a mingin enzatgei da far spida. Pli tard ei quella processiuin vegnida scursanida tochen Tschamut per s. Pieder e s.Paul. Dapi biars onns van ins per quei di a Nossadunna a Zarcuns. Tier la medema baselgia da Nossadunna fan ins ussa era las processiuins da s. Gieri e s. Martin ch'ins fageva pli baul a Muster. Da s. Martin mava la processiuin direct en claustra. Da s. Marc denton ils 25 d'avrel mava la processiuin da s. Vigeli tier s. Gion Battesta e leu seuneva Tujetsch e Medel cun Mustér e mavan lura comunablamein tier s. Placi. Leu fuva messa cantada e silsunter mavan las treis processiuins ensemen en claustra. En baselgia dalla claustra fuva lu priedi, in onn il plevon da Tujetsch e l'auter onn il plevon da Medel. Denton saveis vus cumprender co il magun fageva sevaler. Co mass quei oz a prau cun nossa veta cumadeivla? (scret 1934!)

Nies bien amitg, Giachen Lurenz Caduff haveva entras pinar e rugalar si l'ura da Rueras fatg renome, aschia ch'el ha silsunter aunc stuiu rugalar pliras uras baselgia. L'ura da Sedrun, quella da Trun, da Schlans, da Zignau e perfin quella da Surcuolm, tuttas quellas uras han giu reparatura da nies meister Caduff en sia fravia a Rueras. Per rugalar quella da Rueras era ei vegniu tratg si ina collecta en baselgia. Era il giuven meister urè pagaus cun quella? Quei savein nus buca dir.

Stai ussa tier tia lavur, vegnas ti car lectur a dir a mi. Mo gie, ti has raschun, mo ils vegls raschunan aschi bugen da caussas quasi emblidadas. Nos vegls eran prezis aschia, e.... sche nus havessen scret si quei ch'ei raquintavan fuss ei oz per nus ina gronda valeta.. Perquei hagies pazinzia cun mei sche jeu hai beinduras furschau in tec en la historia dil vitg denter la raquintaziun da nossa lavur per la baselgia.

Il signur cassier Lucas Cavegn haveva per moto: L'ura sto si. Ed el ha capiu da tschintschar anavon ed anavos cun ils benefactors entochen che l'ura ei stada finanzia-da. Beingleiti suenter ch'ils zenns eran el liug eis el entaus en correspondenza cun nies um da confidonza sgr. Teofil Locher da Dübendorf. Numnau signur ha lu dumandau e la finala contrahau cun la fabrica d'uras baselgia ad Adelfingen tier Jacob Mäder.

Cun ils 13 da zercladur scriva signur Teofil Locher il sequent: Fetg stimau signur Cavegn, la precisa calculaziun dalla ura per la tuor ha sin fundament ch'igl ei vegniu si in pli grev tuchiez survegniu enqual midada. Il plat da cefras sa buca vegnir fatgs ord relief sco ei fuva priu en egl perquei ch'ei vegnan sin lenn e crap. Perquei fan ins els meglier massiv e pli solid. Las cefras vegnan buca mo dadas color sco stau previu, mobein suleradas. Medemamein la construcziun dil mecanissem dall'ura ha da vegnir fatgs meglier sinaquei che la temperatura dell'aura possi far all'ura neginas difficultads. Cheutras seresultescha ei ch'ils cuosts vegnan empau pli bia che quei che havevan giu previu all'entschatta. Ils cuosts vegnan ussa sin 4150.– francs. Nus havein adina plidau da 4000.– francs e quintau cun quei. Quei che seresultescha ussa entras quella megliera construcziun surprendel jeu fetg bugen ord veglia amicezia e carezia per Tujetsch. Duess Sedrun buca saver sedecider era per ina nova ura sche vegn la fabrica mattei a garegiar dapli. Mo era en quei cass vegn Rueras buca gravegiaus cun pli bia che sco avon scret.

Aschia signur T.Locher.

Tier quels 4000.– francs vegn lu aunc vitier il menar dalla staziun a Rueras, lura diversas lavurs per il montar ella, sco ruosnas el mir, cementar en strubas ect.. En tut cuosts da ca. aunc 250.– francs.

Tenor brev da Teofil Locher digl 1 d'uost 1929 di el: Cheutier tarmettel jeu il contract per ina ura baselgia cun la Firma Mäder ad Adelfingen e supplicheschel da vuler suttascriver in exemplar e tarmetter a mi anavos. Jeu hai aunc mess vitier ch'il pagament fetschi jeu. Quei vul dir: Jeu paghel l'ura aschi gleiti sco ella ei montada e rugalada tut en uorden. Rueras tarmetta lura a mi ils 4000.– francs cura che'els ein avon maun. Quei ha da dir nuot, era sch'ei peglia in auter onn. Quei che survarga 4000.– francs paghel jeu sco gia detg.

Per memoria lein aunc prender in per caussas ord il contract.

1. L'ura ha da vegnir tratga si ina gada a di, igl ei quintau ch'ella mondi 30 uras.
2. Tuttas quater varts dalla tuor han da survegnir in plat ura da circa 1.80 meters diameter. Endadens tier il mecanissem ha ei medemamein dad esser in plat ura per controlla, che muossi las uras e minutas.
3. Ils quarts deigi l'ura dar sin il zenn d/b e l'ura sin il zenn grond f.
4. Il mecanissem dall'ura ha da vegnir fatgs tenor il plan fig. 22 cun ina mecanica dad ira e duas da dar. Il mecanissem d'ira ei da construir tenor il sistem bein secumprovaus cronometer (Freipendelsystem) patent nr. 97458.
5. Quei che partegn il material ha l'ura da vegnir construida cun material d'emprema qualidad. Las lonschettas han dad esser surtratgas cun irom e suleradas. Medemamein era las cefras romanas 23.5 carat.

6. Cun l'ura auda milsanavon la scaffa per metter en e serrar ella sco in esch cun si siara, ina finiastra d'in maun cun en veider.

El decuors dil meins settember 1929 ha l'ura dad esser fatga. Signur Jakob Mäder dat ina garanzia da tschun onns. L'ura ha da vegnir pagada suenter ch'ella ei montada, 3350.– francs immediat, 800.– francs tenor cumadeivel en 5 onns cun pagar in tscheins da 5%. Il pagament savein denton, ei vegnius fatgs entras Teofil Locher.

Il montar l'ura ei vegniu empau pli tard che quei che era provediu. Havend a Sedrun era schau vegnir ina ura han ei montau igl emprem a Sedrun. Sedrun ei Sedrun e nus essan mo Rueras. Mo quei ha plaschiu pauc a nies cassier, da vegnir mess anavos suenter tonta premura. Mo sgr. Locher ha capiu da metter la cuolpa sil luvrer. Sedrun seigi era pli freid e mender ira sidengiu da freid e ctr. La finala ei tut iu ora en uorden. S. Giachen ha adina giu quita per aura e tut per sias lavurs.

Essend stada montada ed en funcziun ei la cumissiun baselgia seradunada en l'ustria da Leci e discurreti tgi schar rugalar e trer si ella. Tenor bien cussegl dalla firma speditura dueva l'ura vegnir tratga si ualti en regla las medemas uras mintga di ed era unschida tenor sco ei era vegniu mussau.

Denter la cumissiun ha ei dau ina viva discussiun. Plirs fidavan tuttavia buca al caluster in semegliant car pategl. Cheu ei signur ugau-baselgia Vigeli Venzin-Giger sescaldua bravamein. El laschi sco ugau-baselgia buca prender naven fadigias al caluster e dar zana auter. Gia tier l'ura veglia havevan ils vischins concludiu da dar ina curtauna dumiech al caluster per trer si l'ura. Tier lezza ura era ei negin "Kunst" per menar siadora quellas peisas. Empau spuretg dad ira da quella scala cun scalems rodunds si tochen tier quella porta da maun sisura. Da leu mava ei pulitas scalas tochen si el vegl clutger. Da quella scala enasi eran stai si dus students teologs e mirau tier co ils emprems communicants sturnegiavan giun baselgia enstagl da dir ils paternos cumandai digl augsegner. Buca dishonorai la casa da Diu, han ils students detg d'ina ruosna giuaden. Ils affons han pigliau tema e fugi giuadora. Mo lura, ora si sut scola viu tgi ei vegniu giuadora ed aschia ei la medischina stada fallida per ina outra gada.

L'ura nova era denton buca sco ins haveva spitgau. Ina gada mava ella memia plaun ni s'avonzava. Era cun il dar era ei buca regla. Cun caschun che signur Locher ei vegnius las usitadas vacanzas han ins selamentau. El ha intercuretg la caussa e telefonau alla Firma Mäder tgei e co ei seigi cun l'ura. Numnada firma ha rispundiu: Els hagian tier semegliantas uras aunc mai giu ina che hagi disdiu e quella hagi era dad esser endretg. Cheu stoppi ei muncar tier il trer si e tier il rugalar. Sinquei ha quella gada igl ugau radunau la cumissiun en casa da Giachen Lurenz Caduff e sin sia proposiziun e suenter haver tedlau in u l'auter co il caluster laschi trafficar dunna ed affons, han ins unanimamein

concluidi da prender naven il treer si l'ura al caluster e surdar ad in um da pli bia enconuschientscha cun mecanicas ed era cun megliera confidonza.

Suenter quella midada ha l'ura suenter paucs dis funcziunau endretg tochen oz.

Nus essan ussa alla fin cun nossa lavur. In schabetg less jeu aunc menziunar e memorisar. Cun caschun ch'ins ha ruchegiau anora il mir dator baselgia ei vegniu discuvretg las restonzas d'ina caplutta veglia stada avon che questa baselgia. Quella caplutta era drizzada encunter la damaun In meter circa naven dil mir fuva aunc miez igl altar. Ils mirs mavan encunter sera sut ils presents en ed ei fagevan 1.90 meters ladezia. Ei fuss forza pusseivel da vegnir vidlunder con liunga ella fuva cun caschun sch'ei vegness fatg en novs bauns dalla vart dils umens. Il pader Baseli Berther, il scultatur da caussas veglias ei vegnius l'auter di sil plaz e contemplau cun interess, miserau e fatg ina skizza en siu cudisch da notizias.

Ed ussa seregurdein aunc inagada da tuts quels che han fatg dil bien per nossa baselgia, ils indigens ed auters. Cheu seregurdein dil bien pader Baseli ch'ei vegnius cun il sgr. architect Hardegger che ha regalau per nuotzun ils plans. Milsanavon seregurdein dil sgr. Teofil Locher che ha fatg aschi bia bien per ils zenns e per l'ura nova. Co fuss ei sche ils vischins da Rueras fagessan devoziusamein ina gada il salid da Nossadunna per quei signur per urbir ora entras Ella la regina dil sogn Cor da Maria, la via tier nossa sontga cardientscha catolica per nies grond benefactor. Ei fuss era buca stau malplazzau ina messa perpetna per tuts benefactors da quellas lavurs e sacrificis prestai.

Sogn Giachen nies patrun baselgia intercedi per ils morts e per ils vivs, per Tei ed era per mei.